

Lajčák i Rehn pozivaju na brz povratak evropskom programu



Pozdravljujući volju stranačkih lidera u BiH da se vrate evropskom programu, Miroslav Lajčák i Olli Rehn danas su naglasili potrebu da se situacija u zemlji normalizira i da se ponovo krene s radom. Visoki predstavnik i specijalni predstavnik EU sastao se sa evropskim komesarom za proširenje u sklopu jednodnevne posjete sjedištu Evropske unije, gdje se također obratio i Odboru za vanjske poslove Evropskog parlamenta.

Akcioni plan koji su lideri stranaka dogovorili 23. novembra ove godine u Sarajevu nadogradnja je Mostarske deklaracije i predstavlja daljnji korak u pravom smjeru. Međutim, suviše je rano za ocjenjivanje ovog procesa. "Cilj mora biti poboljšanje političke situacije i fokusiranje na plan reformi. Razgovor, dogovor i kompromis jesu evropski način", izjavio je Lajčák nakon sastanka sa komesarom Rehnom.

U obraćanju članovima Evropskog parlamenta, visoki predstavnik i specijalni predstavnik EU osvrnuo se na ekonomsku i političku situaciju u Bosni i Hercegovini, zastupajući tezu da je proces evropske integracije najbolji način da se reformira sistem upravljanja i vladanja zemljom.

Nepostizanjem sporazuma o reformi policije u septembru, politički lideri su u biti odbacili obavezu koju su preuzeli prema EU prije dvije godine. Zato je visoki predstavnik i poduzeo mjere 19. oktobra, kako bi se unaprijedila efikasnost

rada Vijeća ministara BiH i Parlamenta BiH. "Ako ne postoji evropski proces koji će unaprijediti funkcionalnost države, onda se to mora rješavati putem postojećeg okvira koji nudi Daytonski mirovni sporazum", izjavio je Lajčák.

Ove mjere će omogućiti da se Vlada i zakonodavni organi počnu baviti nagomilanim poslom koji se mora odraditi da bi se riješile hitne socijalne i ekonomske potrebe Bosne i Hercegovine, kao i dugačkim spiskom zakonodavnih aktivnosti koje prate integraciju u EU, rekao je Lajčák.

On je također pojasnio da intervencije visokog predstavnika više neće biti potrebne čim lideri Bosne i Hercegovine sami počnu da rješavaju pitanja nefunkcionalnosti i političkog zastoja.

Međunarodna zajednica nije dobroćudni posmatrač političkih događaja u Bosni i Hercegovini; ona je uložila ogroman finansijski i politički kapital u poslijeratnu izgradnju zemlje i njenih institucija; ona je garant sporazuma koji čuva mir u zemlji više od deset godina i ona mora pokazati da i dalje ovu dužnost uzima ozbiljno, zaključio je visoki predstavnik i specijalni predstavnik EU.